

Age Dimodi

Neala olelo oboba

Foloea Dimodima beba gowe dödela i.

Dimodiie emeda Yu udia salea, eda Geleso sosogo sulo. Ie eedoda Giligi dolö nelo. Dimodi eda Geleso sosogo, asigi hedabi negei. Bolobinisi Gale-siaie gaamu Ilisidala ami nebegi, Foloea beagole-lahilä, Ado Mala Hedabi säla daidola moholöie, ea Dimodima, Ne ugila negemolö awähadula säi (Abosolo 16.1-3). Awälahilä, hobeala Foloea Dimodima sähalea, Udia dolö Godea wela ifosisi Ebesa gaamugi nefolalebe amoli ugila negesalea, ilibalä ami namialola säi.

Foloea Dimodima beba gowe dödela iasi amoda, ado geloi edefade ohodoaie dödela iasi.

Ageda, Godeie mala dofä dibe amo gadola made säla olelelo nefolalebe amea, Geleso sosogo nefolalebe amoli dahila neloea, idihë namialola säi.

Ageduda, udia dolö Godea wela ifosisi amolia gomalä hamosa namolö dialealage, amase, udia dolö sigi aligiloea gowe gadola hamomolö dialealage säla i.

Osodada, Foloea Dimodima sähalea, Dimodi, di Geleso Yesuie hamoi hamolasilo dolö hedabi namolöie, gowe gadoi namolö dialealage, Geleso sosogo sege elö elölagila nefolalebe amoli, dia beaha namiäia gelolasiloie hamoi i amo, hedabolafali beaha nea, hamosa namialola säla wagai.

¹ Neda Folo, Geleso Yesuie abosolo neawe. Nilile damula aulo Godeage, nilia asigia sisiläfüsa

namolö mi neebe Geleso Yesu ameage, ne abosolo namialai neawe.

² Dimodie, na dima beba gowe dödëla äasisago. Dia asigi afädë negei ameada, dida dofä nie malöfali gadoi neagomelë.

Nado Godemadilage, nilile Dafidilo Geloi Geleso Yesumadilage ugila negelasiloge, bobasëloge, dalulasiloge diamiaia hamesa neawe.

Godeie mala dofä dibe amo gadola made olelesa neebe amo fädäla beaha namialola säi amo

³ Bolobinisi Masedonia moholö awähalea, na dima gelola säi amo gadola, Ebesa gaamugi ami namialo. Dolö odoaea mala elöi olelesa neebe amoda, dia ilima olelemabiola sämolöiege, ⁴ amase, ilia siiba sedalu amomu säla olögöloge, yaua mäulali aliligi misi amolile ëi amomu dusugala säloge, fisimalola säla imolöiege, ami namiäia hamesamelë. Ado amo gadoi säsebe ameada, udia dolöea Godeie hamoi hamomäia ugila negelo mademelë. Ameada udia dolö gëgëlasilo. Asigi afädë negelahilä, udia dolöea ie hamoi hamolomelë. ⁵ Dima sämalasebeweie mida gowe. Gelesoie udia dolöea odoa boba hamomäiaie säha. Iso asigi gähe namolöge, iso asigia Godeie siigi dofeala helësëmolöge, Godema asigi afädë dofä negela namolöge, mala amolimadilada boba hamolo amo mulomelë. ⁶ Udia dolö odoaea mala amoli fisilahilä, asiala besula, ado mi maade amogi gagaola nawesa neamelë. ⁷ Iliä Godeie mala säla negei amoie säla olelelo namolö hamesalea gaso, ilia olelesaleage, amase, dofä amalamelëla gelola sähaleage, mi gomalä gabula hili helësëlo made neamelë.

8 Nilia helësésalea, afädëa Godeie mala amo mogola oleleseda, mala amoda hedabila helësësa nea. 9 Nilia elö helësésaleada, mala hamomolö amole, made hamomolö amole säla negelo amoda, udia dolö asigi mogoi nefolalebe amolile säla negelo mademelëla helësësa. Amoda udia dolö goweli gadoiie säla negeila helësësamelë. Udia dolöea mala damuloge, ado made nabala hamologe, Gode made helësëloge, nafade hamologe, Godeie mala made nabeloge, nagadaia malamü helësëloge, eedole emele baagomäia nufideloge, udia dolö odoa baagomäia nufideloge, 10 udia dolö fa neloge, dolöea hilimu Sodomö mala hamologe, Yosebe gaula asi amo gadola udia dolö neala gaula auloge,* wäfalü säloge, gudisalea wäfalü gomalä melümelëla säloge. Amase, mala nafade odoa hamola mala dofä säi amo damulo nefolalebe amolile hamomolö amole, made hamomolö amole säla negei dialea. 11 Mala dofä säi amoda Ado Mala Hedabi Godea na olelemäia ü amogi dialea. Gode yo digalo hido elöi neebe amoda Ado Mala Hedabi amea olesa. Udia dolöea ü ü gauiä adamolö dialea.

Gelesoea ne bobasëi amo helësëlahilä, nesegesa neamelëla säi amo

12 Geleso Yesu nilile Dafidilo Geloia nema geloi ü amogi nesegesa neawe. Mida, ea na dofea hamomolöi neebela helësëlahilä, ü hamoi hamolasimäia ne memelela ifosi amogi. 13 Dafidida na e gagadeloge, ü udia dolö neala sëlasiloge, ado nafadela säloge nelomelë. Gaso, Dafidilo Geloia ne bobasëi gabio. Mida, amala hamoi

* **1:10:** Mi Gäwi 37.12-36 bimalo.

amo hamosalea, na Geleso Yesuma asigi afädë negela made nea, nafade hamosala helësëla made fuduia hamosa nelomelë. ¹⁴ Nilile Dafidilo Geloïie bobasëlo amo nema nobala adugalasisio. Ema asigi afädë negeloge, odoa boba hamologe, Geleso Yesuma dibe amoleda nema ïasio.

¹⁵ Ado dofäfalï amo nilia nabaha maadei dibe amoda gowe.

Geleso Yesu e nafade hamolo nefolalebe amoli damula moholöïe nagadaïa digai nelo.

Ado amoda dofä gabula helësëmolö dialea. Nafade hamolo amolile dafidiloda nemelë. ¹⁶ Amala hamosa nebegi, ea ne bobasëi amoïe mida gomalä gabio. Eda aabela habobalo made amo olemolöïe, Geleso Yesuea nafade hamolo amolile dafidilo ne bobasëi. Amase, udia dolöea hobeä, ema asigi afädë negelahilä, namolöï namolö gaula nefolamolö amolia ne beala, hï ea ilimage amo gadola wäla bobasëmolö gabula helësëmäïaïe. ¹⁷ Hä, eda beaha aligilo Gini namolöï neebe amoge, baagolo madege, bimolöï madege, hï emu Gode nebegi, nilia eda ilibiala säla, ïe ëi gauia adamolö amo diamolöï diamolö galea. Amala hamomäïamelë.

Dimodi dia nafadebalä gelola nudusa namialola säi amo

¹⁸⁻¹⁹ Nïe malö Dimodie, dafidi di helësëla bea säla negei dibe amo gadola, dia hamomäïaïe sähago. Asigi afädë negei go amo wälasimu nea, iso asigia Godeïe siigi dofeala helësëlahilä, gelola nudusa namialo. Odoaea ilile iso asigia Godeïe siigi dofea madela helësëlahilä gaso, neadigila auaula aligila, ödä du igigi dusudasila fisilo amo gadola, ilile asigi afädë negei amo neala nafadesa

maadeimelë. ²⁰ Amala hamosa nelo amoligi dolö äudäda, Haimelëasale Alegisädale neamelë. Elea hobeala Gode made gagademolö helësëmäia, na dolö äudä amole mugabe Saidanië naabogi gausimelë.

2

Godema adomolö mala säi amo

¹ Hä, ado edefade afädë hamomäia hamesebe amo dafidi säla iahago. Udia dolöea Godema adosaleada, udia dolö sulubadela helësëla sämolöge, imola ëdëgëmolöge, hili ilige odoage ugila negemäia sämolöge, nesegelege, adomolö dialea. ² Ilia, aso, ema nabala ugila negemäia adosaleada, beaha aligilo gini neebe amolige, sigi aligilo neebe amoli sulubadelage ugila negemäia adomolö dialea. Mida, nilia Godema helësëmolö dibe amo gadola helësëlahilä, mala mogoi hamosa nea, dofeala aumala namolöge, daluloge gaula namiäiaie. ³ Ado amo gadoi sämolö amoda hedabi. Ameada, nilile damula aulo Gode obeägilasilomelë. ⁴ Eada udia dolö sulubadela damula aulo gaula namiäiage, ado dofä amo dawadigila namiäiage hamesa nea. ⁵ Amala säi amoie mida, Gode afädëfalïmu nea. Amase, dolö afädëfalïamu Godele udia dolöle segela sälo mogogi nea. Dolö amoda Geleso Yesu emelë. ⁶ Ea udia dolö sulubadela sigi obëgësa maademolöie, ea hile namolö amo fisiga gai. Amala hamoi ameada, Godea udia dolö sulubadela damula moholö hamela olemolö helësëla, segeyo daiala negeigifalï amo olei. ⁷ Mi amoie, ne abosologe, ado uuala säla iloge namiäia, Dafidiloea ne memelela ifosi gabio. Fii odoama

Godeie mala dofä amo säla olelelo namiäia, ne memelela ifosi amo neawe. Na ado säseweda wäfalä made, dofä gelola sähamelë.

⁸ Dili sege sulubadela gedosegida, dolöea Godema adomäia hamesa neawe. Dolö amo hili ili nafolala Godema odala äala nea, mihaläla gëgëla made nea, ilile naabo gauia adala, Godema adomolö dialea.

Udiaea hamomolö mala dibe amo

⁹ Amo gadolamu, elö hamese amoda gomalä. Udiaea gugusäla bimäia made, faguloge nelebo gäsebe amoge hedabola gämolö galea. Busa hili momadomolöge, nelebo goloea hamoi difolalebe ameage, amase, bageie isogi momadolo hedabi helebe näia gadoi amea domalo momadomolöge, fagulo hedabifalä bidi edefadea niige, gämolöi mademelë. ¹⁰ Iliada hamoi hedabi hamolo amo momadola gämolöi galea. Geleso sosogo neala sälo udia amolia momado gämolö dofeada amomelë. ¹¹ Udiaea adola made, dofä nagadaiala salea, Godeie ado mala nabolö dialea. ¹² Na ado säsebe amoda gowe. Udiaea dolöma ado mala säla olelemäiage, sigi aligimäiage, namialamolöi mademelë. Iliada adola made, nabaha samolö galea. ¹³ Amoie mida, Godea dafidi Adamadale hamolahilä, hobealada Iba hamoi. ¹⁴ Amase, elöda, Adama dahila nii made. Udia dahila nealahilä, ea nafade hamoi. ¹⁵ Amai gaso, udiaea malö ägüsaleda, Godema asigi afädë negeimu saleage, boba hamolamu saleage, mala mogoi hamolamu saleage, gugusäla bimäia made hamola fiseda, Godea ili damula moholömelë.

3

Udia dolö Godea wela ifosisi amoli sigi aligilo amolida gowe gadoia namolö dialeala säi amo

¹ Ado dofäfalä amo nilia nabaha maadei dibe amoda gowe. Afädëa udia dolö Godea wela ifosisi nefolalebe amoli sigi aligilo namolöila helësësa nea galëda, eada hamoi hedabi hamesa neamelë.

² Amai gabugi, sigi aligilo dolö amoda asigi mogoi, odoaea ea asiala hamosebela made säloea namolö dialea. Amase, udia afädë goaeage,* nelebo dibe amo sulubadela asigi gäwila hamoloeage, asigi sigi aligiloeage, mala mogoi hamoloeage, udia dolö söfë mase amoli hedabola aealoeage, säla olelemolö dawadigilo gauiage, namolö dialea. ³ Gagaomolöie gagaolo ödä edefade made nulöeage, nudumolöie fodolofali abadigila made, udia dolö hedabola helësëla hame negeloeage, made gëgëloeage, amase, muni gesami made auloeage, namolö dialea. ⁴ Hile udiale malöle hedabola sigi aligiloeage, ea ado säsebe amo hile malöla ilia hedabola nabeloeage, namolö dialea. ⁵ Afädëa ie udiale malöle hedabola made sigi aligiseda, eada udia dolö Godea wela ifosisi nefolalebe amoli abeahäla sigi namolödu.

⁶ E Geleso sosogo waliomu neloeada namolöi mademelë. Ea gugusäla bimäia hamosa neëgi, Godea mugabe busabalä gudi amo gadola, dolö amobaläge amala hamoloeamelë. ⁷ Udia dolö segea nefolalebe amolia dolö goda asigi mogoi neala sälo amea namolö dialea. Mida, ilia e

* **3:2:** Udia afädë goaeala säi amoie mida, udia äudä niage, udia elö fa neloeage, made namolö dialeala säi.

gagadesegi, e mugabe busaie gei dibeami fädäloeamele.

Digono dolö amolida gowe gadoia namolö dialeala säi amo

⁸ Amo gadola wäla, digono dolö ili asigi mogoimu nea, ado äudä sälo madea namolö dialea. Wani ödä edefade made nulöeage, muni aba adogola made neloeage, ⁹ iso asigi gagadelai nea, Godeie ado dofä säi dibe amo gaula mogosamu aligiloeage, namolö dialea. ¹⁰ Ila abilia hamosebelela bimolöie, dafidi fedogola bealahilä, ilima nemola sämolö made galäda, ilia digono hamoi hamomolö dialea.

¹¹ Amo gadola wäla, ilile udiage* asigi mogoimu nea, baagido made säloge, nelebo dibe amo sulubadela asigi gäwila hamologe, mala hamosebe amo sulubadela mogoimu hamosa namolö dialea.

¹² Digono dolö udia afädë goaea namolö dialea.* Ië malöge, ië mosöa aligiloge hedabola sigi aligimolö dialea. ¹³ Digono dolö nefolalebe amolida, hamoi hedabi hamosebe amo udia dolöea bealahilä, dolö amolida asigi mogoi neala säsegida, ilia, bedäla made, Yesuma asigi afädë negemäia gelola säla olelemolömelë.

Godeie ado mala mi dibe amoda edefademalämelëla säi amo

* **3:11:** 3.11 Dawadigi odoaea helësésaleada, Giligi adoea damo gowegi dädëida, digono udiaie säila helësëi. Odoaea helësésaleada, Giligi ado amoda, digonosi udiaie säila helësëi. * **3:12:** 3.12 Udia afädë goaeala säi amoie mida, udia äudä niage, udia elö fa neloeage, made namolö dialeala säi.

¹⁴ Na beba gowe dödësaleada, di neebee gui hä, fodolofali moholöla helësësa neawe. ¹⁵ Dödëla iäseweie mida, ne hä di neebee fodolo made maaseda, beba gowe nidelahilä, dia udia dolö Godeie mosöa nefolalebe amolia mala gomalä hamomolö dibela dawadigimolömelë. Godeie mosöla säsebe amoda, Gode namolöi neebee wela ifosisi amoli nefolaleamelë. Ea wela ifosisi amolida igau gadoige, bagifufu gadoige, ado dofä amo ila neëgi nefolaleamelë. ¹⁶ Godeie ado mi dafidi ulufadigila made, negesi dilo. Amoda geloi edefade gelola dibe amo afädëa iso gäwi made gabula sämolöi mademelë.

Eda dolö domalola ulufala digai.

Godeie Gesamia e mogoifali neamelëla olei.

Şelesaia fiia e meli.

İe ado mala fii odoama säla i.

Udia dolö sege elö elölagi nefolalo amolia ema asigi afädë negei.

E selesaia mosöa yo digalo dibeaa ami fedalasimelë.

4

Dolöea mala dofä dibe amo gadola made säla olelelo neala säi amo

¹ Godeie Gesamia ulufadigila fädäla sähalea, hobeaa udia dolö odoaea Godeie mala digila moholömelë. Digila awälahilä, ilia dahila nelö mugabege, mugabeie mala säla oleleloge nabala bögëla moholömelë. ² Asigi fea negela wäfalä sälo amolia mala amo gadoi säla olelelölömelë. Nuloea gobei baho dibeaa ami badililo amo gadola, ilile asigi badili nea. ³ Dolö amo gadoi amolia säla olelesaleada, dolöea udia nimabiolage, molö odoaa

made mualolage, säla olelelo nea. Godea udia dolöea nesegelahilä molö muäia hamoi amoda ilia muabiola sälo. Ado dofä amo dawadigi asigi afädë negei nefolalebe amoliada molö dialea. ⁴ Nelebo sulubadela Godea hedabimu hamoi dibe amoligida afädë fisimolöi mademelë. Nilia Godema nesegelahilä nimolö dialea. ⁵ Mida, Godea ado säla negei ameage, amase, nilia ema adose ameage, Godea amoda hedabi gabula sämolömelë.

Dimodi dida Gelesoie hamoi hamolo hedabi gowe gadoi namolö galeala säi amo

⁶ Dia ado amoli didoolalima säla ialahilä, Godeie ado mala dofä säla negei dibe amoge, mala hedabola säla olelei amo gaula mogosa neebe goge, gesami gelomäiaie molö amo dia nahamu aligiseda, Geleso Yesuie hamoi hamolo hedabi di namolömelë. ⁷ Dia fädäi nagadaiaie sibalo galone made amoli baagi iala auaula neada, asigi gelomäia Godea säi dibe amomu bégëla hamosa namialo. ⁸ Domalo gelomäia oodo bibila hamoseda, amoda holöbö ugila negemolö gaso, asigi gelomäia Godeie ado oodo bibisa aligiseda, amoda nelebo sulubadela hamose amo ugila negemolö. Walio neebeweiege, hobeä namolöi namolö amoiege, ugila negemolömelë. ⁹ Ado dofäfalä nilia nabaha maadei dibe amoda amo. ¹⁰ Ado amo helësëlahilä, nilia hamoi baagi sëi edefade hamosamu neebewemelë. Mida, nilia Gode namolöi neebe amoma asigia sisiläfüsa nea. Eada udia dolö sulubadelaie damula aulo nea. Ea amala hamolo neada, ema dofä asigi afädë negei neebe amoli hä, damula aulo nea.

¹¹ Dia udia dolöma mala amoli säla olelesaleada, hamomalola gelola säla iaha namialo. ¹² Udia dolöea di gafodo gähe gabula bealahilä, di memalä gadoi hamoloea, dia ado sämolöge, mala hamomolöge, boba hamomolöge, asigi afädë negela neebe goge, asigi gagadelai namolöge, Geleso sosogo nefolalebe amolia di bealahilä, ilige di neebe go gadoi namiäia namialo. ¹³ Ne misiäia beaha neda, Godeie bebagi ado säla dödëla negei dibe amo udia dolöea nabuäia nidelahilä, mala amo säla iadigi, säla oleleladigisa namialo. ¹⁴ Dolö dafidi nelo nefolalo amolia dima naabo negesisolo amo gala, afädëa bea säi ameada, Gesamiie galu dima i amo gaula nebegoda fisimabio.

¹⁵ Udia dolö sulubadelaea mala amoli dima bausebego bimäia, dia mala amoli oodo beala hamosa namolöie, dihidi gelolahilä hamosa namialo. ¹⁶ Dihidige, amase, dia mala olelesebegoge, hedabola idihë namialo. Fisila made, amala gelola hamosa aligiseda, dihidige, dia mala olelesegi nabaha neebe amolige damula aulo gaula namolömelë.

5

Dimodima udia dolö ili hile sosogofali gadoi namialoi amo

¹ Dia ödëdëi sefolalebe amolima nemola sämabio. Die diadoma sälo amo gadola wäla, ado geleä säla hamogimalo. Dolö geloi nefolalebe amolimage, dihile didooma sälo amo gadola wäla sämalö. ² Udia sesalebe sefolalebe amolimage, dihile diemema hamolo amo gadola wäla hamomalo. Udia geloi sefolalebe amolimage, dihile dialifima hamolo

amo gadola wāla, asigi gagadelaimu nea hamomalo.

Udia didalo sigi namolö malage, udia didaloea hamomolö malage dibe amo

³ Udia didalo ugila negelo afädë maade, hüdofali seëda, amo hedabola helësëla ugila negemolö dialea. ⁴ Udia didalo amoïe malöge, amase, yayege seëda, ilia Godeïe mala mogola gaula neebe amo, ilile mosöa aligilo amolima olela, ilile mäuea ili ugila negei amo helësëla, bu ilige ugila negela obëgëmolö dialea. Ilile hamoi edefade hamomolö amea, hamoi odoa baagila asi dialeala helësëmäia dia säla ïmalo. Mala amo gadola hamosa nefolalebe ameada, Gode neala obeägïlasilomelë. ⁵ Udia didalo e ugila negelo afädë maade, hüdofali sebe amea Godema asigia sisiläfüsa salea, yoba gasigige ema adosalea, ugila negemalola adosamu aligilo salea. ⁶ Udia didalo odoaea domaloïemu hamela mi hamosa salea galëda, ili salea gaso, baagoi gadoi salea. ⁷ Ili asigi mogoi nea, odoaea ilia asiala hamosebela made sämäia, mala dima säi amo gadola Geleso sosogo ilima säla ïmalo. ⁸ Afädëa e sosogofalige, e sosogo odoage beala made ugila negeseda, ea Godeïe mala säla negei dibe amoma baagi ïala, Gode made helësëlo nefolalebe amoli gadoi made, eda nafadefali nafade nea.

⁹ Udia didalo ilile ëi bebagi dëdëla negei dibe gogida, udia didalo odoa gäheo i nabülasi gafeia

made baagi sefolalebe amolile ëi gegeDOMABIO.*
 E dafidi dolö afädëmamU fila asi amoge,* ¹⁰ ugila
 negelo udia amo saleala säloge, sulo. Amala
 hamolo salea, malö hedabola sigi aligiloge,
 näiadodi fii odoa ie mosöa misialaloge, amase,
 Geleso sosogoie emo nigime hëloge,* udia dolö yöi
 gaula neebe amoli ugila negeloge, mala hedabi
 elö elöla hamologe, sulo. Udia didaloea mala amo
 gadoi hamosa filo sefolalebe amolile ëimu dëdëla
 negemolö dialea.

¹¹ Udia didalo gäheo i nabülasi gafeia made baag-
 ıla asi sefolalebe amolile ëida dëdëmamU. İlia do-
 maloie hameloea Gelesoma baagi İala, dolö elö
 moholö helësëmolö. ¹² İlia amala hamola dafidi
 säla negei amo damuseda, gudimolö dië melëloea.
¹³ Amase elöda, bobogolo mala amo İlima bäu-
 la, İlia segeyo hili İli namolö amo yogobodila,
 udia dolö odoaea mosöa fifi nawelo. Amomu made,
 ado gaula nawela baagido sämolöge, udia dolö ëi
 säla hololöla, ado sämolöi made dibe amo säsäla
 nawesa aligilo. ¹⁴ Hä, na helësësaleada, udia di-
 dalo gäheo i nabülasi gafeia made baagila asi
 sefolalebe amolida dolö elö fila awälahilä, malö
 ägüla hilile mosöa hamoi hedabola beaha namiäia
 helësësamelë. Amala hamoseda, ado nii neebe
 amea gagademolö fu made bimolömelë. ¹⁵ Mida,

* **5:9:** 5.9a Edoie ilile ëi dëdëidu, nilia fädäla dawa made gaso,
 dawadigi odoaea helësësaleada, udia didalo odoa amolia säla nege-
 salea, İlida dolö made fila, Godeie hamoi hamosamu namolöla säla
 negesebegi, Geleso sosogo İliada amala sälo amolile ëi dëdëlahilä,
 amoli sigi aligila molö nelebo ugila negela İaha aligilola helësëi.

* **5:9:** 5.9b Dolö afädëmamU fila asila säi amoie mida, dolö elö fa
 neloda, made dëdëmolö dialeala säi. * **5:10:** 5.10 Yone 13.1-17
 bimalo.

odoaea idi mogoi amo fisila, mugabe Saidani bēgēla aulo salea.

¹⁶ Geleso sosogo udia afādē sebe amoie sosogo didalo odoa seēda, udia dolō Godea wela ifosi nefolalebe amoli made yōmäia, udia amo sosogo amohi ugila negemolō dialea. Amala hamoseda, udia dolō Godea wela ifosi amoliada udia didalo ugila negelo afādē maade, hidofali sefolalebe amoli ugila negemolōi galea.

Dafidi nelo nefolalebe amoli sigi namolō mala dibe amo

¹⁷ Dolō dafidi nelo nefolalebe amoliada udia dolō hedabola sigi neēda, ili hedabola helēsēla bidi hedabi imolō dialea. Mala sāla iadigi, sāla oleleladigilo amolida dofā amamolō dialea.

¹⁸ Mida, eladi gadoi damula negei amo iso hedefala didigafumäia, sugua gao emoea emosala aligi mosäia sigi neada, sugua gaoea made muäia ie nafi neegimolōi mademelēla sāla dēdēla negei dialea.* Ado elō sāla dēdēla negei dibe amoda gowe. Hamoi hamolo neebe amogalida, bidi imolō dialeamelēla sāla dēdēla negei dialea.*

¹⁹ Afādēa sāhalea, Dolō dafidi nelo ebedaea nafade afādē hamoimelēla sāseda, nabuabio. Äudäeage ohodoaeage, hamosa neebe melimelēla sāseda, nabualo. ²⁰ Asiala hamolo amo udia dolōie siigi ifosilahilä, ilia nabala bedämäia, dolō amoma nemomalo. ²¹ Godeiege, Yesuiege, selesaia fii memelei nefolalebe amolilege siigi nea, dima mogolasila gomalä sāhago. Hamomäia na dēdēla

* **5:18:** 5.18a Mala Bu Egei 25.4 bimalo.

* **5:18:** 5.18b Madiu

10.10ge, Ulugu 10.7ge bimalo.

ï amoli hamosaleada, udia dolö odoa dia hame negelo neebe amolibalä obeägisalea, odoamada auaula made, sulubadelama afädëdilamu hamomalo.

Dimodi dia mala hamosa nebegoda dihidi idihë nea hamosa namialola säi amo

²² Dia hä fodolofali aabela afädëma naabo negesimabio. Odoaea nafade hamoi amo dima asiala baaloea. Dida asigi gagadelai namialo.

²³ Di iso olo lolosamu aligise ameadä, ödä hïdomu muabio, wani ödä holöfalï nadigisa namialo.*

²⁴ Dolö odoaea nafade hamosebe amoda ulufa negelahilä, nafade hamoi amo udia dolö sulubadelaea dawadigilahilä fodolofali gudilo. Odoaea nafade hamosebe amoda hobeafali ulufadigilo. ²⁵ Amo gadola wäla, odoaea hedabi hamosebe amoda, aabela ulufadigilomelë. Amase, hedabi hamoi ulufala made hamoi dibe amoge, musügä negela namolöi mademelë.

6

Hamoi hamolasilo nefolalebe amolia mala hedabola hamomolö dibe amo

¹ Beaha aligilo nefolalebe amolia Godeïe ëimage, ïe ado malamage, ado nafadela made sämäiaïe, hamoi hamolasiloma i damui muugia negela begei gadoi nefolalebe amolida, ilile beaha aligilo neebe amo hawa nea, dofä hedabola helësëlahilä, ea hamomalola säsebe amo gadola

* **5:23:** Wani ödä mualai amoïe mida, e oloi amo ugila negemäiaïe.

nabala hamomolö dialea.* ² Hamoi hamolasilo ilile beaha aligilo amo Geleso sosogo neëda, ilia helësësalea, nie beaha aligiloda hä, nedoofali neawedalahilä, holöbö memalä gadoi hamola helësëmolöi mademelë. Iliä ugila negesebe amo Geleso sosogo neebe ameada, ilia e boba hamosebe ameage, ie ado nabala hamoi gelola hamomolö dialea.

Mala elöi säla olelemolöge, muni boba hamomolöge dibe amo

Dia mala amoli udia dolöma säla oleleladigi, gelola säla iädigisa namialo. ³ Afädëa nilile Dafidilo Geloï Yesu Gelesoie ado mala dofä säla negei dibe amo fisila, mala hedabi amo mogola gaula säla olelela made, mala elöi oleleseda, ⁴ dolö amoda asigi maade nea, gugusäla bimäia hamosa neamelë. Asigi nafade negela nea, ado yafie gaalu dagabola gëgëmolöge, ado eloalola nudumolöge hamelo. Amala hahamola awälahilä, mudiamolöge, udia dolö moge mogela gëgëmolöge, adoea mihisadiala sämolöge, odoama asigi nafade negela sämolöge, ⁵ dolö asigi nafade negei hilimu gëgësamu aligimolöge, mala amoli gadoi bäulo. Ado dofä amo dolö amo gadoimada maademelë. Iliä helësësaleada, Godeie malaeada ili nelegei negelo dafidilo hamolasimolö gabula helësëlo.

⁶ Amai gaso, afädëa Godeie mala gaula mogosa nea, Godea ema i negei dibe amo gadoida dofeala helësëseda, dofä nelegei negelo dafidiloda amomelë. ⁷ Mida, nilile nemea nili negele ägüsolo

* **6:1:** 6.1 I damui muugia negela begeila säi amo gadoida, sugua gaoea nelebo afädë gaula dusugamäia, i damui muugia negela begelola säi.

amo gala, afädë made gaula misi. Amase, nili nagadaia wila awäsolo amo galage, afädë made gaula moholö. ⁸ Amamolö gabugi, domalogi salugamolöge, molö molöge galëeda, neda hä dofeada amola helësëdelä. ⁹ Amaimo, nagadaia nelegei muni yafie negemolöila helësëlo neebe amoli fedogola beasegige, gei dibe amige, asigi made gäwila nafadelasilo yafie hamelogige digalomelë. Hamelo amoli gadoiada udia dolö neala nafadelasilo. ¹⁰ Mida, muni boba hamolo dibe ameadä, nafade elö elöla dibe amo sulubadelaie mi dialea. Udia dolö odoaea muni gelola hamehahilä, dafidi Godema asigi afädë negei amo dīgila asiala asimelë. Amala hamoi ameadä, ilile isogi gäwila doa salimu nea, hili ili sē edefade nahamu neamelë.

Namolöi namolö gelola gaula namolö dibe amo

¹¹ Amai gaso, Godeie dolöo, dihidi mala amoli gadoi dibeamadila fisäla mosalo. Amala hamosa nea, bua gaula bēgēla hamomolöda goweli. Asigi mogoi namolöge, mala mogoi hamosa namolöge, Godema asigi afädë negemolöge, boba hamomolöge, yöi diēgi, dofea, aso madela namolöge, odoabalä hame negela namolöge, mala amoli bua gaula bēgēla hamosa namialo. ¹² Nudusalea gelola nudulo amo gadola, Gelesoma asigi afädë negela nea, gelola nudusa namialo. Dia udia dolö yafiea nabuäia, Godema asigi afädë negei neawela fädäla säla ulufadigisolo amo gala, Godea namolöi namolö amo gaula namiäia imolöie di weigomelë. Dia namolöi namolö amo gaula fēdöla namialo. ¹³ Sulubadelagali namolö ilo Gode neebe amoie

siigige, Geleso Yesuea Bödiasa Bailadima säla ulufadigisalea, ado dofä fädäla säi amoie siigige, dia afädë hamomäia gelola säla iasebe amoda gowe.

¹⁴ Dima hamomalai amo afädë damula madege, amase, sälage baala made, odoaea dia asiala hamosebela säloeage, hamosa neëgi wäla, Dafidilo Geloï Yesu Geleso ulufadigimolö segeyo amo beselagalamäia, amala hamosa namialo. ¹⁵ Godea segeyo hï daiala negei amo gausiala digasolo amo gala, Geleso e ulufadigimolömelë.

Gode eda obeägilo mi nea, hï emu Beaha Aligilo neamelë.

Eda gini sulubadela neebe amoie Ginige, amase, dafidilo sulubadela neebe amoie Dafidilo Geloige e nea.

¹⁶ Gode hï emuda made baagolo nea.

Eda yo digalo edefade dibeami nea.

Afädëa yo digalo dibeami ga madela aligimolöi mademelë.

Afädëa e siia meli made nelo amo, siia bimolöi made nea.

Ïe ei gauia adamolöige, e geloi neamu neala sämolöige, Gode hilemu dialea.

Amala hamomäiamelë.

Nagadaia nelegei yafie negei nefolalebe amolima asigi afädë negemäia säla i dibe amo

¹⁷ Nagadaia nelegei yafie negei nefolalebe amolima ado goweli gelola säla imalo. Gugusäla bimäia, nagadaia nelegei gäalimulo difolalebe amoligi asigia sisiläfüla made, Godemamu asigia sisiläfümalamalo. Godeada gëla made, nilia obeägimäia nelebo sulubadela hedabimu iaha maadelo nea. ¹⁸ Ilima hamoi hedabi yafie

hamomolöge, ugila negemolöge, nelegei gëla made odoagali sogomolöge, amo gadola hamosa namialola säla imalo. ¹⁹ Ili amo gadola hamoseda, nelegei hedabi gafedela negela, hili ili hobeä namolö amoie igau gadoi hamogila negemolö. Ameada, namolö dofäfalä amo gaula namolömelë.

*Dihï hamoi hamosebego hedabola idihë nami-
alola säi amo*

²⁰ Dimodie, hamoi dia hamomäia dima gausi amo fädäla beala hedabola hamosa namialo. Odoaea nagadaiaie ado iso gäwi made nalä didiäha sefolalebea amige, mala dawadigisa maadeimelëla säha sefolalebea amige, di aligila made, sisigaha namialo. Ili dawadigisa maadeila sälo gaso, ilile dawadigiloda wäfalä, Godeie ado malabalä ado nii neamelë. ²¹ Ili odoaea helësësalea, dawadigilo amoda dofämelëla helësëla sälahilä, Godema asigi afädë negei amo fisila asiala awäsio.

Godeie ugila negelo dilibalä diamolöi diamiaia hamesa neawe.

Hä amo.

Edolo Bible
Ruth, Matthew, Mark, Acts, 1 & 2 Timothy, Titus,
and John's Letters in the Edolo Language of Papua
New Guinea
Sampela hap Buk Baibel long tokples Edolo long
Niugini

copyright © 2010-2012 Wycliffe Bible Translators, Inc.

Language: Edolo

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-02

PDF generated using Haiola and XeLaTeX on 11 Nov 2022 from source files dated 4 Oct 2022

688323a7-0b01-555d-b52f-07c624ea681b